

TE HUIHURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa
Te hoo e piti farane i te matahiti hoê.

Nu. 6.

Tiunu 1930.

Mat. 24.

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo
papaibia e Tamate Aposetolo; Faaauhia ei reo Tahiti e Elita.

HIRO'A FAAROO 12. *Te faaroo nei matou e, ia au-
rarohia te mau arii, te mau peresideni, te mau faaterehau, e
te mau haava, ia haapaahia, ia faaturahia, e ia faaturahia
atu hoi te mau ture o te fenua nei.*

Uiraa 1. Ua faatia anei te parau papai i te haapaoraa i te
mau ture hau?

P. Ua faatia hoi te parau papai i te haapaoraa i te
mau ture hau, e ratou atoa tei maitibia ei feia toroa na te
hau. E rave rahi te mau parau no te haapaoraa o te mau
peropheta tahito i te mau ture.

Parau Tauturu: I te matamua ua faaterehia te taata i
raro a'e i te utuafare ra, e tae noa'tu hoi i te mana no te
haapoheraa. A feruri no nia ia Hagara, te piti o ta Adera
hama vahine, e tavini hoi oia no Sari. Ua tupu mai te feii i ro-
pu ia Hagara raua o Sari e ua faatura Aberahama i ta'na vahi
ne matamua mai te parau e, "Tei to rima hoi te tavini vahini,
a rave oe i ta oe e hinaaro ia'na." E no te faaheporaa o
Sari ia'na ua horo e atura oia i roto i te medebara; farerei
ihora oia i te melahi o te faaue atu ia'na ia haere oia auraro

faahou atura ia Sari. Taió i te Genese 16:1-9. Ua faatura te melahi i te mana faatere no te vahine matamua no te utuafare, noa'tu e, ua riro Hagara ei vahine piti i roto i taua utuafare ra.

I muri mai i te faatereraa na te metua o te utuafare, na Iehova iho i faatere te taata na roto i ta'na ra mau tavini. I taua taime ra ua na ô maira Oia e, "Eiaha oe e faaino i te mau haava, eiaha e parau ino i te tavana i nia iho i te hui taata na." (Exodo 22:28) Ua horoahia te mau haava i to Iseraela. "Te feia haava, e te feia toroa ta oe e haapao i te mau oire atoa ra. (Deut. 16:18)

Na muri mai i te reira taime ua horoahia e arii i to Iseraela e ua faahapa Davida ia'na iho no te mea ua tapu oia i te ahu no Saulo te arii. A taió i te 1 Samuela 24:5-6.

Te vai atura te mau parau no te faaturaraa'tu i tei mau i te mana faatere; "E ta'u tamaiti, o Iehova ta oe e mataú e o te arii ra." (Maseli 24:21) Teie ta'u parau ia oe, E haapao i te parau a te Arii, no te tapû hoi i mua i te aro o te Atua." (Koheleta 8:2)

Uiraa 2. Ua faatura anei Iesu i te mana no te hau?

P. Oia mau ua na reira Oia, ua faatura noa Oia i te mana faatere no te hau Roma. I te taime i anihia'i te moni aufau, ua faatia Iesu i te reira aniraa noa'tu ua ite Oia e, e ere ia te aniraa tia; atira noa'tu ua roaa mai te moni na roto i te semeio e ua aufau atura Oia. A hio i te Mataio 17:24-27,

Ua imi atoa te mau Pharisea i te ravea e fifi ai Iesu mai te na ôra'tu e: "E mea au anei i te ture ia hopoi te moni aufau na Kaisara, e aore anei?" E ua faatia Oia i te mau ture na roto i To'na pahonoraatu e: E hopoi maori i ta Kaisara ia Kaisara ra, e ta te Atua ra, e hopoi âia i te Atua ra." (Mataio 22:17-21)

A haavahia'i Iesu ua faatura noa Oia i te mau haava noa'tu To'na hamani-ino-raa-hia.

Te paturaa ia Ierusalemia Api

TA RATOU MAU HOROARAA TEI FARIIHIA

I te taime i horoahia'i te heheuraa tei faaue i te paturaa i te hiero i Navu, o tei riro paha hoé ahuru matahiti i muri a'e i teie heheuraa ta'u i taió ra, ua faaite mai te Fatu i teie faahitiraa papu e te maramarama, "Amene, amene te parau atu nei au ia outou, ia faaue atu vau i te hoé faaueraa i te hoé pae no te tamarii a te taata nei, ia rave i te hoé ohipa i to'u ra i'oa e ia haere te reira mau tamarii a te taata mai to ratou atoa ra puai, e mai ta ratou atoa ra faufaa, ia rave te reira ohipa, mai te faaea ore, e ia haere mai to ratou mau enem i nia iho ia ratou, e faataupupu ia ratou i te raveraa i te reira ohipa, inaha, eita atura e tia ia'u ia titau faahou te reira ohipa i te rima no te reira mau tamarii a te taata ia farii ra i ta raton mau horoaraa.

No reira, i farii ai au i te horoaraa a te feia ta'u i faaue ia patu i te hoé oire e te hoé fare i to'u ra ioa, te mataeinaa ra, o Iakesoni, Missouri, o tei faataupupuhia e to ratou mau enem i te na ô maira te Fatu to Atua." B. F. 124:49. B. F. S. 107: 15.

Ua faaitehia mai teie parau mau rahi ia tatou, aita te Atua e titau i te mau taata i te otiraa o te hoé mau mea i te taime aita roa e ravea, eiaha ra i te Atua, i te taata nei ra. Mai te mea ra, no teie nei parau te reira faaneraa, e aore ra te tahi noa'tu ohipa tei faauehia mai e te Atua i te Ekalesia ia rave, e ua faataupupuhia te reira na roto i te hamani-inoraa o te enem i e, aore ra, na roto i te hoé ture fenua, noa'tu, hoé ahuru ia to te Atua hióraa i te reira, e eita Oia e titau i te reira vahi ia ratou.

I NIA I TE MAU MOU'A OFAI

Eiaha outou, te mau taeae e te mau tuahine e manaó e, te parau nei au e, e ere Iakesoni, Missouri te vahi paturaa

no te Feia Moá, aore ra, e vahi no te paturaa i te hoé oire te parauhia ra o Ierusalema Api, e mea papu roa ra, e ere i te hinaaro o te Atua ia faariro i te reira te vahi haaputuputuraa rahi matamua no te Ekalesia i teie nei anotau hopea nei, ahiri to'na te reira hinaaro aita Oia i aratai i te mau taata i te mau peho no te mau mou'a ofai, e aita atoa te mau parau a te mau Peropheta tahito no e ra i faaîhia. Hou te fanauraa o te Faaora, ua na ô maira Isaia i to'na hióraa i te mau mea e tupu a muri atu, e riro ia tae te mau mahana hopea ra, e faatiahia te mou'a ra o te fare o Iehova i nia i te tubuai mou'a, eiaha ra i nia i te mau vahi papu o Missouri, e aore atoa ra te mau aivi o Ilinoi, e faatiahia râ i nia i te tubuai mou'a, e faateiteihia ia i nia'e i te mau aivi, e taeruru mai te mau Edene atoa ra i reira. E rave rahi te taata e haere ma te parau e, e haere mai, e haere tatou i nia i te mou'a o Iehova, i te fare o te Atua o Iakobo; ia aha; maori ra, ia haapiihia i ta'na mau haapaoraa e ia haere na te eá ta'na i faaite maira.

NA TE MAU VAHI ATOA O TE AO NEI

Mai te mea ra, aita i faaîhia te mau parau o Isaia e te Ekalesia alesu Mesia i te Feia Moá i te mau Mahana Hopea nei i roto i teie hoé hanare matahiti i maira a'e nei, aita i faaîhia i teie nei â. I te taima ta to tatou metua o Iakobo i tuu atu ai to'na rima i nia iho i ta'na tamaiti ia Iosepha e haamaitai ia'na, ua hau to'na haamaitairaa i te haamaitairaa i horoahia i to'na mau taata i mua ia'na, ua horoahia hoi te fenua ra o Paletine ia ratou, no Iosepha te rahi o te mau otia o te mau mou'a mure ore e te fenua tamaru pere-rau; e te fenua tei i te auro e te ario, e te mau mea maitatai o te fenua ra; e te fenua e tupu ai te haaputuputuraa o te mau taata o tei faariro te medebara ei ana tiare, e patuhia hoi te mau oire i taua fenua ra i te mau vahi i vai

ano i mutaa ihora: e faaroohia hoi te reó o te tamaríi i te himeneraa i te mau vahí i vai ano mai te maniania ore i mua'tu.

Ia hió atu vau i te amuiraa o te Feia Moá i teie nei mahana te ite nei au i te faaíraa i te mau parau a te Peropheta. Ua putuputu mai iô nei te mau taata no te mau vahí atoa o te ao nei. Ua haere mai ratou i Ziona. E mau tamaiti hoi ratou na Iosepha, e ua horoahia ia Epharaima, te tamaiti hopea na Iosepha, teie mau mea'toa na roto i to'na metua. Ane te nehenehe o teie mau ohipa, e ta'u mau taeae e te mau tuahine e, ahiri i roaa mai ia tatou te auraa mau no te reira. Te vai noa ra te faaoraraa o Ziona i mua ia tatou nei.

Faaahia ei reo Tahiti e Roroma

(E Tuatihia teie nei parau.)

I te oire Roto Miti, Utaha,

I te 5 no Eperera, 1930.

E HOMA NO TE MAU FENUA MOANA--

te mau taeae e te mau tuahine, e tae noa'tu i ta outou mau tamaríi, e tae noa'tu hoi i te mau hoa no te parau mau e ati noa'e i taua fenua na, te parau ia e au ia tatou, ia ora ana'e tatou i te here mau o to tatou Metua i te ao ra.

Etau rahi teie, e au ai te parau e, ia ora na i te aroha o te Atua. Hoé ia hanere o te matahiti teie i faatiahia mai ai te Ekalesia a Iesu Mesia i nia iho i te ao nei i te tau hopea nei. Hoé ia hanere matahiti i tia mai ai teie fare ta te

Atua i patu mai i nia iho i te mato, e tae noa'tu i te hamani-ino-raa, rau te huru, e te patoiraa, te tupu noa nei â i te rahi, e te puai, e te etaeta hoi. I roto i taua hanere matahiti nei, ua poro-haere-hia te Evanelia a te Fatu e ati noa'e te rahiraa o te mau fenua o te ao nei, e tae noa'tu i te mau fenua moana ra.

E tiaa rahi taata te putuputu mai i te oire Roto Miti nei i teie nei mau mahana, e tauturu i te mau ohipa no teie nei Eperera rahi na te Ekalesia, e faaroo hoi i te mau parau uru-hia a te mau tavini upootia a te Atua. Ua faauanaunahia te mau purumu no te oire nei i te mau reva, ua rau te huru; ua rahi te mau tomita tei faataahia no te haapaoraa i te tahi tufaa e te tahi tufaa o te mau ohipa; ua faaineinehia te hoé haapiiraa hohoá rahi roa tei parauhia, "Te Vea no te Mau Tau," no te faaiteraa i te huru, te faufaa e te tere no te parau a te Atua mai te matamua roa mai, e tae noa mai i teie nei tau. Hoé tauatini e tiahapa taata te rave i te mau tufaa no teie nei hohoá rahi. E faaitehia ia i na po e toru ahuru aore, e no te rahiraa o te taata te hinaaro e hió, e mea tatitihia te mau parahiraa. Tei o nei hoi te mau totaiete hohoá taata, no te hamani i te hohoá paraparau, ei faaiteraa e ati noa'e te ao nei, e ua i noa te mau vea rarahi i te parau no te Ekalesia "Momoni" tei tae i te hanere o To'na matahiti.

E inaha hoi, i rotopu i teie raveraa rahi, tei o nei o matou, o te mau orometua hoí mai no Tahiti mai, e tae noa 'tu i to matou mau fetii e te mau hoa, i te haapaoraa i to matou putuputuraa totaiete orometua; e te faatupuhia nei te haamanaóraa e te arohâ ia outou e i to outou hui tupuna i te mau fenua i poro-haere-hia te Evanelia a te Metia e matou nei. E te papaihia nei teie rata poto ei faaiteraa i taua aroha e taua here nei ia outou paatoa.

Te tupu atoa nei te mauruuru e te oaoa rahi i te mea, ua parauhia matou ei mau vea no te parau mau i te fenna moana, e i te mea hoi, ua farerei matou ia outou, e ua parau tatou te tahi i te tahi, e ua tupu te here, e te tamau nei hoi te haamanaóraa. Ua tupu atoa hoi te mauruuru e te oaoa i te mea, e mau melo tatou no te Ekalesia a Iesu Mesia, e mau melo hoi i roto i taua fare etaeta e te hau ta te Atua iho i patu, e te tupu nei te arueraa a Davida ta hito i roto i to tatou mau aau, i te na oraa'tu e,

“O Iehova to'u tiaí, e ore roa vau e ere. Te faataoto nei oia ia'u i te mau ana heeuri ra, te aratai nei oia ia'u na pihai iho i te pape atatia ra. E faahoí oia i tau varua, e aratai oia ia'u na te eá titiaifaro, no to'na ra íoa. E ia haere noa'tu vau na te peho ra, o te maru pohe, e ore â vau e mafaú i te ino, te pihai-atoa-iho oe ia'u; to raau e te tootoo tei haamahanahana mai ia'u. Ua faanahonaho oe i te tahi amuraamaa na'u i mua i te aro o tau mau enemí; ua faatavai oe i tau upoo; e te î nei tau auá. E riro a te maitai e te aroha i te pee mai ia'u i te mau mahana'toa o to'u nei oraraa: e parahi â vau i roto i te fare o Iehova e maoro noa'tu o'u pue mahana.” (Salamo 23)

Faaitoito â tatou paatoa; rave noa i te maitai; tauturu i te mau orometua; haapii noa i ta outou mau tamarí e i to taata tupu i te parau mau; haamaitai i te Feia Moá, e haapao noa i te mau parau a te Atua. Ia ora na â outou i To'na aroha rahi e i Ta'na mau haamaitairaa e au ai, ia manuia ta outou mau raveraa parau-tia, to outou ia tiaí, e ta matou ia pure.

Tera mai to matou mau íoa:

Ole, Tiulia e te tamarí

Alama e Ruita

Mama Borobiti

Ira

Farani Fulumare

Mati Fulumare

Viliamu Pupure	Tihoni Tanona
Leroi Maloi	Elita
Iotefa Damarona	Ferete Rositera
Ioane Orotona	Hepera Tefera
Etara Topera	Tarane Manitata
Tamati Poropiti	Samuela Dimona
Calaia Larasona	Viliamu Teara
J. Leonard Davis	Henere

Te Mau Parau Apî

PARAU API NO PINAKI

Papaihia e Tepoheiva â Fareata

I te Mahana maha, i te 3 no Eperela 1930, i te poipoi no teie nei mahana, ua hoe atura matou i Nukutavake na nia i na vaa e piti, hoé vaa rahi, e hoé hoi vaa huru nainai. E ono taata i nia i te vaa rahi: 1- Tagihia â Maro, 2- Taiepo â Tamaku, 3- Tehina â Teiura, 4- Ruaroa â Teuira 5- Ah Sini (Tinito), 6- Tepoheiva â Fareata. Te mau taata i nia i te vaa huru nainai: 1- Temanu â Pura, 2- Taihuka â Tekakeahara, 3- Kairiga, 4- Teua â Tehina, e tamahine nainai roa.

Mai teie te huru no to matou hoeraa, ua hoe noa'tura matou i Nukutavake no te mea hoi, e mea huru mania rii e na nia noa maira hoi te matai i Nukutavake. Ia huru atea atura matou i Pinaki, ua haere maira te mau taata no nia i te vaa nainai i nia i te vaa rahi e hoe i te vaa rahi. Ua haere atura hoi te mau taata no nia i te vaa rahi i nia i te vaa nainai. Ua hoe noa'tura matou mai te peapea ore, e maoro aera to matou hoeraa, ua haere faahou maira te mau taata no nia i te vaa nainai i nia i te vaa rahi. Ua na reira atoa'tura hoi te mau taata no nia i te vaa rahi, ua haere

faahou atura i nia i te vaa nainai. Ua hoe noa'tura hoi matou, e maoro aera, e mai te mea ra e, ua tae matou i te afa tia no Pinaki e Nukutavake, ua tau faahou maira te mau taata no nia i te vaa nainai i nia i te vaa rahi, e ua haere o Tehina â Teuira e o Taihuka â Tekakearahara e o Ruaroa â Teuira i nia i te vaa nainai. O te toru hoi teie o te tauraa o te taata. Ua parau atura Ah Sini 'Tinito', "A hoe, e ia maoro ra, a tapiri mai i te vaa, e tamaa tatou".

Ua hoe noa'tura hoi matou e te vaa nainai ra, ua na te pae i nia ia ia matou, e na mua mai hoi, e ua tae na te pae i raro mai ia matou, e mai te mea ra ia e, e toru ehuru e tia hapa metera te atea ia matou. I reira, ua faaroo ratou i te haruru. Ua ite ratou i te hoé maó rahi i te Paturaa i to ratou vaa, e ua horo atura te maó i te atea, e ua hoi faahou mai na muri mai i to ratou vaa mai te horo puai na nia roa mai i te miti. Ua ite noa'tura matou i to'na hororaa, e ua teitei hoi te maó i nia i te miti. Ua pii atura Tagihia â Maro ia ratou, "A hoe! a hoe! tera iho!" Ua parau maira hoi oia ia matou, a hoe haapeepee e tapapa i te vaa nainai. Aita i maoro, ua tae maira te maó, e ua hohoni maira i muri i te vaa nainai, ua afai aera ia muri i te vaa i nia. Ua pii atura Tagihia â Maro ia ratou, "A rave i te auri! a patia!" Ua rave ihora Tehina i te auri, aita ra e tia ia'na ia patia, aita e taa faahou to'na manaó no te mataú rahi. I reira, ua faarue mai te maó i te vaa. Ua faaitoito noa ra Tagihia â Maro i te parauraa ia ratou, "A hoe, a hoe haapeepee". Ua na reira atoa hoi matou i te faaitoitoraa i te hoe i te vaa ia farerei na vaa. E ua hió faahou atura matou i te maó i te haere-faahou-raa mai mai te puai rahi, e ua hohoni faahou maira ia muri i te vaa nainai, e ua uue ihora oia i te vaa, aita ra e tia ia ratou ia hoe i te vaa. Ua mau roa te vaa i te maó, e i muri mai, ua faarue te maó i te

vaa. Ua faaitoito ihora ratou i te hoe mai i te vaa, e matou atoa hoi, e i reira ihora, ua hió faahou atura matou i te maó i te haere-faahou-raa mai mai te puai rahi, e ua pii noa matou atoa i te faaitoitoraa, "A hoe, a hoe". I te taima mau i tapiri ai na vaa, ua tae mai te maó na nia roa mai. Ua hió noa'tu matou i to'na mata i nia iho i te miti, e mai te puai rahi o to'na hororaa mai, ua patu atura te maó i te ama o te vaa nainai. Ua fati roa te eiato i muri, e ua hohonu ihora te maó i muri i te vaa. Ua huri atura te vaa, e ua topa te mau taata i raro i te miti, e ua oioi noa ratou i nia i te vaa rahi mai te tauturuhia mai e Ah Sini i te umeraa'tu ia ratou i nia. Te mau noa ra te maó i muri i te vaa, e ia tae pauroa mai te mau taata i nia i te vaa rahi, e i reira te maó i faarue ai i te vaa nainai, e ua haere noa maira te maó i pihai iho i te vaa rahi, e ua amu noa'tura i te taupoo i topa'tura. I reira ra, ua faarue matou i ta matou mau papehaari e te tahi atu mau raau, e i reira, ua amu te maó i te mau pape haari ta matou i faarue, e i muri mai, ua pupuha oia i te reira mau haari i rapae. Ua faaineine ihora matou e huri atu i ta matou taehaa i roto i te miti, ia raa mai to matou vaa i nia, area ra, ua nevaneva noa te maó i te mau haari e te mau raau ta matou i huri i roto i te miti. Ua rave mai matou i te vaa nainai, e ua tuu aé na raro i te eiato o te vaa rahi, e ua tuatihia na vaa e piti. Ua painu noa matou i reira, e ua roaa e afa hora, e i reira ua moé atura te maó ia matou.

Ua faaitoito ihora matou i te hoe i na vaa, e ua tae atura matou i Nukutavake i teie pae e fariu tia mai i Pinaki, e i reira, ua tamaa ihora matou i te puaatoro e te faraoa firifiri e te faraoa paapaa. Aita ra ta matou e pape toe, ua pau i te hurihia. Ua hoe noa matou, e ua tae matou i te oire i te hora maha i te ahiahi. I reira, ua hió matou i te

vaa nainai, ua vai noa ra te mau putaputa niho o te maó i nia iho. I to matou manaóraa, e au te rahiraa o maó ra, e fatata e maha etaeta, e to'na aano, e fatata e hoé etaeta. To'na huru, e mea oaoa roa to'na upoo, to'na tino ra, e mea poria maitai ia. E mea ereere roa to'na huru, e te vai ra te mau patapata uouo i nia ia'na.

Ua manaó ihora matou, ia poipoi ae e hoi atu matou i Pinaki na nia i na vaa rarahi e piti. Area ra, i taua pō ihora, ua tae mai te pahi ra, o Propatria, e i poipoi aé, ua re-va'tura matou i Pinaki na nia ia Propatria, e ua taverehia na vaa e piti na muri i te pahi.

Amanu, Tuamotu
12 no Eperela 1930.

Na te Heheuraa Api
Papeete, Tahiti

Ia ora na mai te i'oa o Iesu to tatou Mesia, Amene

E te Heheuraa Api te haponu atu nei matou te mau tomita no te rururaa iti i Otepa i Hao i te ono no Eperela i mairi ae nei no te mau ohipa i ravehia i taua rururaa ra.

Te rê matamua no te haapiiraa i faatere tahohoáhia tei te feia api no te Amaa Amanu. Tei te feia api no te Amaa Hao te rê piti.

Te rê matamua no te Himene kitara tei te feia api no te Amaa Amahu.

Te rê matamua no te nehenehe e te unauna o te paruru tei te Amaa Amanu.

Te rê matamua no te matutu tei te feia api no Hao e tei te Amaa no Hao te rê piti, te rê no te himene tarava tei te Amaa i Hao. Ua faaotihia teie nei parau e te mau tomita. Turuma a Tekehu, Mahiaui a Tehiva, T. Toiana a Kapikura, Tepiki a Painara.

Papaihia e Tepiki a Painara

TEIE TE PARAU API I TUBUAI

Papaihia e Taetaetahi

E mea maitai roa te amuiraa Eperera i Tubuai. Teie te huru o te ohipa i tupu. E maha pupu himene, e hoé pupu gitara, e e mea maitai roa te faatairaa, e mea maitai atoa te haapiiraa i te pô Eperera, E mea itoito te feia apî i te raveraa i te ohipa a te Atua. E mea maitai roa te Amaa i Haramea, ua faaea te feia ruau i te faatereraa i te ohipa a te mau tuahine, e ua faatoroahia te mau tuahine apî e monono no ratou ra, e e mea itoito roa ratou. I te Amaa i Taa-huaia, ua faatoroahia Tetauira e peretiteni no te Haapiiraa Sapati, e te tere maitai nei te ohipa ra.



PARAU FAAITE

**E faatiahia te Amuiraa Atopa na te Ekalesia
A Iesu Mesia I Te Feia Mo'a I Te Mau Mahana
Hopea Nei, i te fenua ra i Hikueru no te mau
tufaa i nia, e i te fenua ra i Takaroa no te
mau tufaa i raro. E faatia-atoa-hia te Amui-
raa i te fenua ra i Tubuai.**

PAPAIHIA E GIHOTI BOROPITI

PERETITENI NO TE MAU FENUA MOANA NEI.

M. Bonnet M. Gerant et Imprimeur,
Rue Brea et de la rue Dumont d'Urville, Orovini, Papeete